

ratione templi sacrario fuisse illata. Eodem quoque Principe Lotharius Imperator, quod plerique alii deinde Imperatores fecere, veteres immunitates ac cætera libertatis jura, ut inviolatæ Venetis manerent, rescripto constare voluit. Cæterum ut Respublica ea tempestate infœliciter foris administrata est, ita domi quoque nihilo fœlicior fuit. Civili discordia non mediocriter jactata est, sex illustribus familiis in factiones duas sua studia trahentibus: hinc Justiniani, Polani, & Basseji: inde Barbolani, Selii, & Sevoli in adversum nitentes, fœdissima spectacula populo sæpius præbuerunt. Sed quum pene ad internecionem inter eos vario eventu media urbe esset pugnatum, Barbolani cum hominibus suæ factionis civitate ejecti sunt: verum non multo post Lodovico Imperatore, ad quem confugerant, annitente, compositis inter utramque factionem rebus, in civitatem restituti sunt. Hæc Petri Tradonici Principatu domi forisque gesta: qui, quum aliquot annos Joanne filio defuncto, quem sibi collegam in Principatu cooptaverat, Rempublicam solus administrasset, facrorumque hora in Zachariæ ædem venisset, factum est, ut quum domum se reciperet, subita conjuratione exceptus, undetricesimo sui Principatus anno sit trucidatus. In re autem tam trepida ministri, qui de more illi apparebant, charitate, ut sit, & studio in senem, aliquandiu injuriam ab eo propulsare sunt conati: sed a pluribus atque eisdem melioribus, pulsi, subito tumultu Ducarium occupavere: ubi a conjuratis obfessi triginta dies, se loco tutati sunt; accepta demum publica fide, ne cui eorum capitali fraudi esset, quod Principis optimi vitam adversus nefariam conjurationem tue-ri voluissent, quodque ut suam salutem a parricidarum injuria tutarentur, publicum locum occupassent, occupatumque semel ad eam diem pertinaciter defendissent: pacti ad hæc, ne civitas impune id factum pateretur, quod facinorosi homines Principem optimum, ac nihil tale meritum, tam fœde trucidassent: indignum fore prædicantes, cives in ea urbe conspici, in qua parricidium per scelus commisissent, populi faciem summi Magistratus cruore respersissent. His conditionibus ex Ducario in æquum descendere. Populus

Trium-

841

*Civilis discordia propter factiones familiarum illustrium.*

864

*Tradonicus Princeps a conspiratis nefarie trucidatur.*